

Un homenahe di Aruba pa Zimmerman

ORANJESTAD - Minister di Turismo, Transporte, Sector Primario y Cultura Otmar Oduber conhuntamente cu Departamento di Cultura Aruba (DCA) ta rindi honor na e pionero di Tumba y Carnaval di Aruba y Corsou, Harry Zimmerman. Zimmerman (64) a fayece dialuna despues cu e ta-



bata malo pa basta tempo. Diabierna e lo wordo dera na Corsou. Segun e minister y DCA, Zimmerman tabata un persona sigur hopi stima tanto na Corsou como na Aruba, mirando cu e tin 20 aña bibando na Aruba cu su famia completo. E tabata un persona hopi conoci den e mundo di musica, como cantante, compositor y tumbero cu a yega di gana festival di tumba na Corsou. "Hopi ta esunnan cu ainda te dia di awe ta corda su cancion Pan Bati. Harry tabata un persona masha alegre y semper cla pa yuda y duna su contribucion unda cu e por na hopi persona, musico y tumberonan."

Riba dia di Festival di Tumba e aña aki el a haya recono-

cemento di Comision Boca Sami, Gobierno di Corsou como Tata di Tumba y Siegfried Dumfries, director di DCA tabata presente den representacion di minister Oduber. Siman pasa Zimmerman a ricibi un homenahe na su isla natal tambe.

E ta un cantante cu a bira hopi popular den añanan '70 y a coy hopi fama den su participacion na Festival di Tumba unda cu el a bira Rey di Tumba na tres ocasion, na 1980, 1990 y 1999.

Minister Oduber y DCA ta expresa palabranan di condolencia na tur famia, amigo, conoci di Harry Zimmerman, na musiconan y pueblo di Corsou y Aruba en general: "Cu Harry sosega na paz." □